

**Ni Presidente
Henry B. Eyring**
Umuna a Mammagbaga iti
Umuna a Pangulu



Inawagan ti Dios ken Kinanunongan dagiti Tao

Kas miembro ti Simbaan, masansan a maawistayo a mangkanunong iti tattao kadagiti awag nga agserbi. Adun a tawen ti napalabas, maysa nga estudiante nga agtawen iti 18 ti nangipakita kaniak no ania ti kaipapanan ti mangkanunong kadagiti katulongan ti Apo. Mabembendisionannak pay laeng babaen ti napakumbaba a pagwadanna.

Karugrugina pay laeng ti umuna a tawenna iti kolehio. Nabuniagan isuna iti nakurang a maysa a tawen sakbay a pimmanaw iti pagtaenganna tapno rugianna ti panagadalna iti maysa a dakkel nga unibersidad. Nagserbiak idiay a kas bishopna.

Idi nangrugi ti serrek ti eskuela, naaddaanak iti ababa a pannakiuman kenkuana iti opisina ti bishop. Bassit laeng ti malagipko iti dayta umuna a pannakisarita malaksid iti panangisarita maipapan kadagiti pannubokna iti maysa a baro a lugar, ngem saankonto pulos malipatan ti maikadua a panagsaritami.

Indawatna nga agkitakami iti opisinak. Nasdaawak idi imbagana, “Mabalin kadi nga agkararagta, ket siak ti mangisao iti kararag?” Ibagak koman a nagkararagakon ket ninamnamak a nagkararag met isunan. Ngem ketdi, immanamongak.

Inrugina ti kararagna iti maysa a pammaneknek nga ammona nga inawagan ti Dios ti bishop.

Indawatna iti Dios nga ibagana kaniak no ania ti nasken nga aramidenna iti maysa a banag nga addaan iti dakkel a naespirituan a pagbanagan. Inkarag ti agtutubo a lalaki iti Dios nga awan duadua nga ammon ti bishop dagiti kasapulanna ket maited kenkuana ti balakad a kasapulanna a mangngegan.

Bayat ti panagsaona, immay iti panunotko dagiti masinunuo a peggad a pakaipasanguanna. Simple ti balakad ngem naited a sibabatad: agkararag a kanayon, agtungpal kadagiti bilin, ken saan nga agbuteng.

Dayta nga agtutubo a lalaki, maysa a tawenna iti Simbaan, ket nasursuruan babaen iti pagwadan no ania ti maaramid ti Dios iti maysa a dadaulo bayat ti panangkanunong kenkuana babaen ti pammati ken kararag dagitay nakaawaganna nga idauluan. Impakita kaniak dayta agtutubo a lalaki ti bileg ti sapaap a pammalubos ti Simbaan (kitaen iti DkK 26:2). Nupay awagan ti Dios dagiti katulonganna babaen ti paltiing, mabalinda laeng ti agtignay kalpasan a nakanunongan ida dagiti nakaawaganda a pagserbian.

Babaen ti pangkanunong a butostayo, agaramid-tayo kadagiti napasnek a kari. Ikaritayo nga ikararagantayo dagiti katulongan ti Apo ket iturong ken papigsaennanto ida (kitaen iti DkK 93:51). Ikaritayo a

sapulentayonto ken namnamaentayo a marikna ti pammaregta manipud iti Dios iti pammagbagada ken iti kanito nga agtignayda kadagiti akemda (kitaen iti DkK 1:38).

Masapul a kanayon a mapabaro dayta a kari kadagiti pusotayo. Ikarigatanto ti mannursuroyo iti Sunday School ti mangisuro babaen ti Espiritu, ngem kas iti mabalin nga aramidenyoy, mabalin nga agbidut ti mannursuroyo iti sango ti klase. Nupay kasta, mabalinyo nga ikeddeng ti dumngeg ken aguray para kadagiti kanito no makariknakayo iti umay a pammaregta. Iti panaglabas ti panawen madlawyonto ti basbasit a panagbidut ken ad-adda a pammaneknek a tultulongan ti Dios dayta a mannursuro.

Bayat ti panangingatotayo ti maysa nga ima tapno kanunongan ti maysa a tao, agkumittayo nga agtrabaho para iti ania man a panggep ti Apo a nakaawagan dayta a tao nga ipatungpal. Idi babassit pay dagiti annakmi, naawagan ti asawak a mangisuro kadagiti babassit nga ubbing iti wardmi. Saanko laeng nga inngato ti imak a mangkanunong kenkuana, ngem nagkararagak pay para kenkuana ket kalpasanna nagdawatak iti pammalubos a mangtulong kenkuana. Dagiti adal a naawatko iti panagyaman para iti aramididagiti babbai ken ti ayat ti Apo para kadagiti ubbing ket bembendisionanna pay laeng ti familiak ken ti biagko.

Nakasaok iti saan pay nabayag dayta agtutubo a laki a nangkanunong iti bishopna adun a tawen ti naglabas. Naammuak a kinanunongan ti Apo ken dagiti tao isuna iti awagna a kas maysa a misionario, kas maysa a stake president, ken kas maysa nga ama. Kinunana bayat ti panaggibus ti saritaanmi, “Ikarkaraganka pay laeng iti inaldaw.”

Mabalintayo nga ikeddeng ti agkararag iti inaldaw para iti maysa a tao nga inawagan ti Dios tapno agserbi kadatayo. Mabalintayo ti agyaman iti maysa a tao a nangbendision kadatayo babaen ti panagserbina. Maikeddengtayo ti agtallugod no idawat ti maysa a tao a kinanunongantayo.¹

Dagitay mangitandudo kadagiti katulongan ti Apo iti pagarianna ket matulongandanto babaen iti saan a maartapan a bilegna. Kasapulantayo amin dayta a bendision.

NAGADAWAN

1. Kitaen iti *Teachings of Presidents of the Church: Joseph F. Smith* (1998), 211–12.

PANANGISURO MANIPUD ITI DAYTOY A MENSAHE

Kalpasan a maibinglay daytoy a mensahe, ibilangyo ti panangbasa ti sumaganad nga adaw: “Ti Apo aramidennakayto a maysa a maysa a ramit kadagiti imana no napakumbaba, napudno, ken napasnek-kayo. . . . Umawat kayto iti nayon a pigsang no makanunongankayo ti kongregasion ken mapasingkeda [set apart]” (*Teaching, No Greater Call* [1999], 20). Idawat iti familia a palawlawanda ti maysa a nadagsen a banag ket kiddawen iti maysa a tao a pada-senna nga itag-ay daytoy. Mangnayon iti saggaysa a tao, mangawis kadagiti dadduma pay a miembro ti familia tapno tumulong a mangingato iti banag. Paglilinnawagan no ania ti mapasamak no agtitinnulong ti tunggal maysa. Ibilangyo ti panangyunay-unay iti balakad ni Presidente Eyring maipapan kadagiti maaramat a wagas a pakanunongantayo iti dadduma pay kadagiti awagda.

AGTUTUBO

Agyamanak iti Mannursurok iti Sunday School

Saan a naipalubos nga usaren ti nagan

Saan a kanayon a naulimek ti klasek iti Sunday School. Kaay-ayok ti dumngeg iti leksion tunggal lawas, ngem no dadduma kasla saan dumdumngeg dagiti dadduma iti klasek. Masansan nga agsasarita wenno agay-ayamda kadagiti electronic device no madama a mangisursuro kadakami ti mannursuromi. Makapaladingit ta no dadduma makitak ti bagik a pasetak iti problema.

Maysa a lawas nalablableskami ngem iti sigud, ket iti gibus ti klase, agsangsangit ti mannursuromi gapu ta awan ti dumngeg iti leksionna. Bayat ti iruruarmi iti siled ti klase, madi ti riknak para kenkuana.

Iti sumaruno a Domingo inlawlawag ti mannursuromi a nagkararag iti napasnek isuna iti dayta a lawas, nga agkalkalikagum iti pannarabay, ket napanunotna a nasken a mangipabuya iti maysa a sine ti Simbaan. Inrugina nga impabuya ti sine, a maipapan iti biag ni

Jesucristo ken dagiti milagro nga inaramidna.

Bayat ti panangpanunotko maipapan iti sine iti dayta a rabii, nakariknaak iti maysa a banag a naidadda-duma. Idi agangay naamirisko a marikriknak ti Espiritu, nga ad-adda may ngem iti napadasak idi. Dagdagus nga inkeddengko a kayatko ti agaramid kadagiti

panagbalbaliw iti biagko nga ad-adda pay a kas iti Mangisalahan, ket naamirisko a napapigsa unay ti padas iti Sunday School iti dayta nga aldaw ti pammanekneko. Agyamanak unay iti mannursurok iti Sunday School ken amin a banag nga ar-aramidenna para iti klasemi iti tunggal lawas.



Pammati, Pamilia, Tulong

Visiting Teaching—Maysa a Sagrado a Naituding nga Aramiden

Sikakararag nga adalenyoy daytoy a material ken, no mayannatup, ilawlawagyo daytoy kadagiti kakabsat a babbai a sarungkaranyo. Usarenyo dagiti saludsod a makatulong kadakayo a mangpapigsa kadagiti kakabsatyo a babbai ken tapno mangaramid iti Relief Society kas aktibo a paset ti bukodyo a biag.

Kas visiting teacher, addaantayo iti napateg a naespirituan a mision nga ipatungpal. “Ti bishop, nga isu ti naordenan a pastor ti ward, ket saanna a mabalin a maaywanan amin a karnero ti Apo nga aggigiddan. Agpannuray kadagiti naparegta a visiting teacher a mangtulong kenkuana.”¹

Napateg unay ti panagkalikagum ken panangawat iti paltiing maipapan iti no asino ti matudingan a mangaywanan iti tunggal kabsat a babai.

Mangrugi ti pammaregta bayat ti sikakararag a panagliliinnawag dagiti miembro ti panguluen ti Relief Society kadagiti kasapulan ti tunggal maysa ken dagiti pamilia. Kalpasanna, babaen iti pananganamong ti bishop, mangted ti panguluen ti Relief Society kadagiti naituding nga aramiden iti wagas a mangtulong kadagiti kabsat a babbai a maawatanda a ti visiting teaching ket maysa a napateg a naespirituan a pagrebbengan.²

Naimpusuan a maam-ammo ken ayaten dagiti visiting teacher ti tunggal kabsat a babai, tulongan isuna a mangpapigsa iti pammatina, ken mangted serbisio no kasapulan. Agsapulda iti personal a pammaregta tapno ammuen no kasano a masungbatan dagiti naespirituan ken naindagaan wenno temporal a kasapulan ti tunggal kabsat a babai a sarungkaranda.³

“Agbalin ti visiting teaching nga

aramid ti Apo no dagiti tao ti ipamaysa wenno pokustayo imbes a dagiti porsiento. Iti kinapudnona, ti visiting teaching ket di kaano man aggibus. Daytoy ket ad-adda pay a wagas ti biag ngem iti maysa nga aramid.”⁴

Manipud kadagiti Nasantuan a Kasuratan

Mateo 22:36–40; Juan 13:34–35; Alma 37:6–7

Manipud iti Pakasaritaantayo

Insuro ni Eliza R. Snow, ti maikadua a sapasap a presidente ti Relief Society, “Ibilangko ti takem ti maysa a mannursuro a nangato ken sagrado nga takem.” Binalakadanna dagiti visiting teacher “a mapnuanda koma iti Espiritu ti Dios, iti sirib, iti kinapakumbaba, iti ayat” sakbay a sarungkaranda dagiti pagtaengan tapno kabaelanda a masinunuo ken maited dagiti naespirituan a kasapulan kasta met dagiti temporal. Kinunana, “Mabalin a mariknayo a mangisao kadagiti balikas ti talna ken liwliwa, ket no makasarakkayo iti maysa a kabsat a babai a malamlamin, yasidegyo isuna iti barukongyo a kasiti aramidenyo iti maysa nga ubing iti barukongyo ket papudotan [isuna].”⁵

Bayat panagtultuloytayo a sipammati kasiti inaramid dagiti nagkauna a kabsat a babbai a

Relief Society, addanto kadaytoy ti Espiritu Santo ket maparegta a mangammo no kasano a matulongan ti tunggal kabsat a babai a sarungkarantayo. “Agsapul[tayo] koma iti sirib imbes a bileg,” kinuna ni Sister Snow, “ket [datayo] maaddaanto iti amin a bileg [datayo] ket maaddaanto iti sirib nga aramaten.”⁶

DAGITI NAGADAWAN

1. Julie B. Beck, “Relief Society: A Sacred Work,” *Liahona*, Nob. 2009, 114.
2. Kitaen iti *Handbook 2: Administering the Church* (2010), 9.5; 9.5.2.
3. Kitaen iti *Handbook 2*, 9.5.1.
4. Julie B. Beck, *Liahona*, Nob. 2009, 114.
5. Eliza R. Snow, iti *Daughters in My Kingdom: The History and Work of Relief Society* (2011), 108.
6. Eliza R. Snow, iti *Daughters in My Kingdom*, 45–46.

Ania ti Maaramidko?

1. Kasano a mapadur-asko ti kabaelak a mangipatungpal iti napateg a pagrebbengak kas maysa a visiting teacher?
2. Kas maysa a visiting teacher, kasano a matulongak dagiti dadduma pay a kabsat a babbai a mangipatungpal iti pagrebbenganda a kas visiting teacher?

Para iti ad-adu pay nga impormasion, mapan iti reliefsociety.lds.org.

© 2012 ti Intellectual Reserve, Inc. Nailatang amin a karbengan. Naimaldit iti EUA. Pannakaanamongna iti Ingles: 6/11. Pannakaanamongna a maipatarus: 6/11. Pannakaipatarus ti *Visiting Teaching Message*, June 2012. Ilokano. 10366 864